



TAPAK 8

Senate nung Donald Trump maitsütet

VOL. XVIII NO. 122 (ADOK 122) DIMAPUR

NHAK nung HCWs 78-i Covid dose tanabuba agiogo



Deobarnü Naga Hospital Authority Kohima (NHAK) nung Managing Director NHAK, Dr. Thorsie Katiry-i COVID Vaccine indang dose tanabuba agiba noksa nung angur. (Kohima, February 14)

Dimapur, February 14 (TYO):

February 14, 2021 nü Naga Hospital Authority Kohima (NHAK) nung Managing Director, Dr. Thorsie Katiry-i anir Health Care Workers (HCWs) 77-i COVID vaccine dose tanabuba agiogo.

Külen, tanü HCWs 11-i NHAK nung COVID vaccine mezüing dose agiogo. Tanü tashi nung session site 47 nung HCWs 1,298 aser Front Line Workers 1255 tashi Covid vaccine mezüing dose agiogo.

NSCN/GPRN-i MP Tokheho Yephthomi aitsür

Dimapur, February 14 (TYO):

Nagaland Lok Sabha MP Tokheho Yephthomi-i Parliament nung Naga ken o benoka jembiba atema sasar ta MIP, NSCN/GPRN-i Deobarnü sangdong ka nung metetdaksüogo.

"Pai jembiba onük nung putiotsü aser yimtenren onüktem

February 15, 2021 nü IGARHQ, 14 AR Tsiesema, 78 BN CRPF Sechü, 93 BN BSF Chedema, Jakhama army camp, Seikhezou UPHC aser 4th NAP Thizama nung Covid vaccine agütsütsü, ta District Immunization Officer Kohima Dr. Rupert Peseyie-i ashi.

Maneni, February 16, 2021 nü Chiephobozou block nung aser February 17, 2021 nü SP Conference Hall Kohima nung police units ajak atema Covid vaccine indang sentong agitsü.

maden. Tokheho Yephthomi-i Framework Agreement sign asüba anogo shitak meshitet aser Naga "underground" aser "militants" olen tai jembibogo. Pai jungjunga meshisadangi jembiba atema Naga nungertem jashidaksüogo," ta MIP, NSCN/GPRN-isa ashi.

Tanünungi LPG cylinder nung Rs50 talila akümer

New Delhi, February 14 (Agencies):

Deobarnü liquefied petroleum gas (LPG) indang cylinder (14.2 kg) ka nung Rs 50 tuogo aser jenjang tasenbaji asüing (Hombar) nungi amshi tenzüksü.

Hombar nungi New Delhi nung gas cylinder ka indang jenjang Rs 769 akümtsü ta osang ajanga ashi.

Myanmar nung Internet services shibangtsür

Guwahati, February 14 (Agencies):

Myanmar nung mitkartem anema lungkak aitba maparen tuluba inyaker aser iba jagi Army-i linük ajungalen internet services shibangtsü telemtetba agiogo.

Myanmar nung February 15 anepdang 1:00 ako nungi anepdang 9:00 ako tashi internet services shibangtsü ta metetdaksüogo.

Külen, linük kübok tongtipang gari lenmangtem nung battle tanks dena mitkar garitem senziür.

Myanmar mitkari özüing tasen ka benokogo aser iba ajanga nübortemi ainertem aruba osang police nem sangoktsütsü tuyur.

Ano, mitkartemisa özüing tanga ka benokogo aser iba ajanga temolung melemi bilemba nisung mashii ka aputsü aser court order

Linük nung totzü company tulutiba Indian Oil-i Indane brand ta ser LPG agütsür. Yimya agi non-subsidised LPG cylinder indang jenjang ya ita shi repringshir aser ita tetenzük anogo nung melenshir. India kübok state balala nung pei pei tax nung ajemdaker LPG cylinder indang jenjang balala lir.

melii nija kiojentem mita aotsü temelaba agütsür.

Myanmar sensotemi tanga linüktem dang nungi parnok yaritsü atema mepishia metetdaksüogo.

Külen, Japan nung nisungtemi Myanmar nung mitkartemi sorkar atsüingdoker yimsü asüba anema lungkak aitba sentong balala ayonga agiogo.

Myanmar yimtiba Yangon nunga nisung aikati shimo milen amer city hall area nung adenshia lungkak aitogo.

Parnoki high school kaketshir Ma Mya Thwe Thwe Khine atema sarasademtsü. February 9 Naypyitaw nung mitkar anema lungkak aitba mapang Myanmar police-i Khine dak injang khalokja liasü.

Rahul Gandhi-i Assam nung Congress atema nüboyimba maparen tenzüksüogo

TENTONÜ (MONDAY) TSÜKLAI (FEBRUARY) 15, 2021 ₹ 5.00



TAPAK 3

COVID-19 Nagaland: Nisung 9 taneptsü angu; 77 anepaludar

Kohima, February 13 (TYO):

Deobarnü Nagaland nung COVID-19 putetba dang nungibo taneptsü angur timba liasü. Tanü nisung 9 taneptsü angu aser 6 dak COVID-19 aliba putet.

"Tanü Kohima nung nisung 6 dak COVID-19 aliba putet. Ano, Kohima nungisa nisung 9 taneptsü angu" ta Health & Family Welfare Minister, S Pangnyu Phom-i metetdaksü.

Nagaland nung COVID-19 puteter ajak agi nisung 12,189 liasü aser parnok 11,877 taneptsü nguogo, ta paisa ashi.

Tang tashi nung COVID-19 puteta alir nisung 88 süogo aser parnok rongnungi nisung 10 bo tanga timtem ajanga asü. Külen, nisung 151 tashi tanga state temi

ogo, ta Health & Family Welfare Director, Dr Denis Hangsing-i metetdaksü.

Nagaland nung COVID-19 nungi taneptsü angubaji 97.44% lir, ta paisa ashi.

District balala nung COVID-19 putetba: Dimapur (6,476), Kohima (3,873), Mon (605), Peren (507), Tuensang (248), Mokokchung (192), Zunheboto (142), Phek (47), Kiphire (41), Wokha (39) aser Longleng (19).

Nisung 12,189 rongnung Traced Contacts 5,071, armed forces personnel 4,674, tanga state tem nungi arur 1,871 aser frontline workers 573 lir, ta Dr Hangsing-isa ashi.

District balala nung anepalurtem: Kohima (60) aser

Dimapur (13).

Tang anepalurtem rongnung nisung ka dak shirangba yimya tera lir saka 71 dakbo shirangba yimya kecha mali.

Taneptsü angurtem: Dimapur (6,329), Kohima (3,748), Mon (594), Peren (506), Tuensang (246), Mokokchung (183), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,28,108 tendangogo. RT-PCR ajanga sample 74,441, TrueNat ajanga sample 37,260 aser Rapid Antigen Test ajanga sample 16,407 tendang" ta Dr Hangsing-isa metetdaksü.

Nagaland nung COVID SOPs tim mesüi lateter: JD(U) Nagaland

Dimapur, February 14 (TYO):

Covid-19 vaccine agiba mapang ka nung Nagaland state sorkari Standard Operating Procedure (SOP) meputepi latetba atema aoksar ta Janata Dal (United) Nagaland-i metetdaksüogo.

"Shisaliok rejutem aser tamangba yimsü dak sendakba tesemtem tsüingda SOPs balala agütsübaji tim masü. Tamangba

yimsü dak sendakba tesem/ tekülem ki nung 100% adenshitsü melar süra kechiba Class 6 aser temapurtem atema dang school lapoker" ta Press & Publicity Wing Janata Dal United Nagaland-i sangdong ka nung ashi.

State Education Authority-i SOP sülen manidakba rejutem merenshitsü ta ashibaji temenünütsüka lir. Nagaland

nung tanur-tain telemsa melii sentepi aoer, anungji class 5 ser teküpok class nung kaketshirtemi Covid menatsü ta asübaji tangatetba meshitak lir, ta parnokisa metetdaksü.

Nagaland state nung Covid-19 atema ketdangsürtemi kanga dang shisadanga tetuyubatem agütsütsü ayongzüker, ta JDU-isa ashi.

ULFA-I-i pur aoba kibongtemi Paresh Baruah'er kinunger dang teyari meshi

Guwahati, February 14 (Agencies):

December 21, 2020 nü ULFA-I aser NSCN teloktemi apuba kinungertemi ULFA-I Commander-in-Chief Paresh Baruah indang kinungertem den ajurutepeggo.

Totzü company nung mapa inyaker nisung ana kinungertemi Deobarnü ULFA-I C-in-C Paresh Baruah'er tasoyimi ao aser par kinungertem den ajurutepeg aser tena chioktsü atema jembitsütsü mepishi.

Quippo Oil and Gas

infrastructure Pvt Ltd nung Radio operator Ram Kumar (35) aser drilling superintendent Pranab Kumar Gogoi (51) na December 21 nü Arunachal Pradesh kübok Changlang district nung apu.

Iba sülen ULFA-Independent-i February 16 tashi nung totzü company dang Bihar nunger Ram Kumar chioktsü atema mapa inyaktsü mapang latettsü.

"February 16 tashi nung company nungi telangzüba

kecha melira, tasüingji Ram Kumar dak mapa inyaktsü. Mapang talila mapluloktsütsü" ta ULFA-I sangdong nung shia liasü.

Central intelligence agencies-i Assam aser Arunachal Pradesh Police den yaritepa totzü company nung mapa inyaker ana tepsettsü meranger, ta ULFA-I-isa metetdaksü.

Indian Armed Forces-i tena chiokdaksütsü atema masü saka tena tepsettsü tasa atonger, ta parnokisa ashi.

Feb 15 nungi garitem nung FASTag enoktsü

New Delhi, February 14 (Agencies):

Centre sorkari FASTag maparen tenzüksü atema anogo apuloktsüyonga aruba sülen joko iba atema mapang magütsüsemtsü ta metetdaksüogo.

Gari atema FASTag meshitsü atema tatembangba anogoji February 15, 2021 nü asütsü, ta Union Road & Transport minister, Nitin Gadkari-i metetdaksüogo.

December 2020 tashi nung nisung 73.36% ajanga FASTag nung register asü.

2019 nungbo 44.31% dang liasü, ta Gadkari-i ashi.

Linük nung FASTag ajanga ita shia Rs 2,088.26 crore toll bendenogo, ta paisa shisem.

Garitemi toll booths nung sen agütsütsü atema FASTag ajanga Radio Frequency Identification (RFIDO) amshir. Iba tag ya gari indang aina tejaklen enoker aser kodang gariji tollbooth ajangdang RFID-i FASTag scan asüba sülen kishi lapoktsür.

FASTags amshiba tajangzüker rongnung kaji toll gates nung traffic ajemba lir. Külen, ashikülak mapa meinyakdaksütsü atema National Highways Authority of India (NHAI)-ia FASTag lane nung tag maliba garitem dang toll saru anasü agi timba agitsü ta özüing latetogo.

NHAI-isa apang shia Motor Vehicle Rule mapa küma inyaktsü metetdaksüogo. Iba Rule ajanga gari tasen nung FASTag enoktsü lateta lir.

Kikruma nung alir Chisami nungeri Feast of Joy mungogo



(Noksa tekalen) Kohima nungi Advocate Khupo Kezo aser pa meina arurtem Feast of Joy benjong nung adendang tangokba noksa nung angur. (Noksa tsünglangba) Phuluzu-zho, Kikruma nung Chisami Joy of Feast alidang tangokba noksa nung angur.

Dimapur, Tsüklai/February 14 (TYO): Kikruma yimtsüng nung akhi mapang tentetba lokti, Chisami puri February 14, 2021 nü Phuluzu-zho, Kikruma Village nung Feast of Joy ayongzüka akhi mapang nungi tanü tashi sobalibali wazüka ayuba atema putu tejen aser taintem bilemteta nübur ajunga chiyongba sentong ayongzüka agi.

Küm 20 dak tema lir iba benjong ya yimtsüng nung tebu-teti tem adenshia senden amenba sülen parnok tsüngta tesendaktep tajung asendenshitsü nükjidong nung ayongzüksü lemteta liasü.

Iba sentong nung jembiba mapang Zumosa Kezo, Retd. Dy. Ranger, Forest Department ajanga nüburtem dang tesüiba mapang nungi amshia aruba yimyatam

amshitsü aser ochi shia alitsü ayongzüka liasü. Paisa nüburtem dang takum wadang ajunga nung dangar den toktepa tetetzü tajung aliba takum kaka asütsü ayongzü.

Iba sentong nung 2021-2023 kümsük atema ketdangpur tasen shima liasü, kong Thiyiswuyo Kezo ya mendenpuba asütsü.

Iba sentong nung telok balala lemsar tetsü-tebou ken tena liasü.

Kohima Law College nung meranga inyaksü sayu

Dimapur, Tsüklai/February 14 (TYO): Kohima Law College nung meranga inyaksü angazükdakja February 12, 2021 nü kaketshir aser tesayur ajungai college compound aser class room tem mürekba nung shilem agi aser tongtipangsa cement, lisem, longsang, longru amala amshia metzü meshiba tesem yanglu aser süng mapa kar inyaka liasü.

Assistant Professor Kezhokhoto Savi, shiba

students' welfare in-charge lir, pai ashiba agi, meranga inyakba ya teshisadangba ka lir aser ibaji ajanga mapa ajak kasa akhumtsübur, aser mapa kata ka dang nungi tematiba mali aser kecha nunga ajemdaker mapa mezüngmeshi masütsüla. Shi temang anibeleva inyaksü süshia mesüra tekolok amshia inyaksü süshia mapa ajak akhumtsübuwa inyaksüla, ta pai ashi.

Iba sentong nung kaketshirtemi shi temang dena

inyak aser kar dak alaka kaketshir timbai cement, lisem, longru amala amshia ki-o-jen tang mezüngbuba yangludanga liasü.

Tamalen Nagaland nung aliba lisopuri asen nisung masürtemi (non-local) dang cement, lisem aser longru amala amshia ki-o-jen yanglutsü akok ta amanga aru, saka tangbo pei sasa pei alitsü ki, apu amala yanglutsü asoshi mapa angazüksü mapang tongja tongogo, ta Savi-i ashi.

Assam Rifles ajanga Ghaspani nung pre-recruitment rally agi



Dimapur, Tsüklai/February 14 (TYO): HQ IGAR (North) kübok Ghaspani Battalion, Assam Rifles temi February 13, 2021 nü Medziphema nung pre-recruitment rally training ka ayongzüka agia liasü.

Iba sentong nung Kohima aser Dimapur district kübok

jila aser yimtsüng balala nungi lanur nisung 84 arua dena liasü.

Iba pre-recruitment rally training nungya Verification of Education Documents, Mock Physical Tests, Medical Tests, Written Tests aser Know Your Forces Weapon Display agia

liasü.

Kasa mapang lanurtem dang Armed Forces pur atema scheme balala agütsüba indanga rasaa ashi.

Iba ama sentong ayongzüka atema lanurtemi Assam Rifles tem dang pelaba lemsatepa liasü.

GPRN ajanga asükhü lemsatep

Dimapur, Tsüklai/February 14 (TYO): Union Territory, NSCN/GPRN indang Leacy, Zheheto Aye mapang talangka shiranga arur anojungi January 12, 2021 nü asüba atema Government of the People's Republic of Nagalim (GPRN) ajanga mangyim-jashi lemsateper, ta sangdong ka ajanga ashi.

Maneni Ao Region kübok Kelingmen yimtsüng nungi Cabinet Office, GPRN indang Office Assistant-I, Talimoo Sema anojungi February 13, 2021 nü asüba atema GPRN-i mang ayimer, ta ashi. Pa ya Naga linük tenzüka wadang nung February 25, 2019 nung tenüng zülüoka liasü.

Tenarpongi linük meimba molungsentsü nung Naga lima tenzüka liasü. Tena asüba ajanga tawa adokdaksüba kanga jangja metettsü aser iba tawa süngdaksütsü kanga tasak asütsü. Parnoki Naga lima asoshi anibeleva arema tenzüka atema parnok tenüng Naga nunger puti otsü nung teti alitsü aser Naga nunger molung nung parnok teti alitsü.

Asür Zheheto Aye aser asür Talimoo Sema na kinunger aser tembartem mangyim tia nung aliba mapang Tulusang Tsüngremi parnok nem tashi aser anisüngzüka agüjang ta sarasadentsür, ta sangdong ka ajanga ashi.

Assam Rifles temi NSCN (KN) züngsem ana apu



Dimapur, Tsüklai/February 14 (TYO): Assam Rifles temi Police den lungjemer operation ka agiba mapang February 11, 2021 nü Railway Station, Dimapur nung OGW (over ground worker) ka apu.

Osang tejangja kar nung ajemdaker Assam Rifles aser Police nungi teshimtet kar

telungjem nung operation ka agiba mapang NSCN (KN) züngsem ana aser OGW ka den mobile phone pongu nguteta liasü.

Item pua alirtem den parnok ket nungi ngutetba oset ya maneni bushisüngdangtsü atema East Police Station, Dimapur nem agütsüogo.

PV Sanjay Kumar-i Manipur High Court indang chief justice inyaksü

Imphal, Tsüklai/February 14 (Agencies): PV Sanjay Kumar-i Deobarnü Manipur High Court indang chief justice mapa agizükogo.

Raj Bhawan, Imphal nung aliba Durbar Hall nung tezüngzüktep agiba sentong ka agidang Manipur angh, Najma Heptulla-i ketdangsüa Kumar tenangzüka agi.

Iba sentong nung Manipur chief minister N Biren Singh dena liasü.

Taoba mapang Kumar ya High Court of Punjab and Haryana nung obendanger ka ama inyaka liasü.

Manipur High Court nung Kumar ya chief justice ama inyaksü asoshi Supreme Court Collegium ajanga taküm

January ita osang agüja liasü.

N Biren Singh-i tweet ka nung, "High Court of Manipur nung Chief Justice ama inyaksü atema Durbar Hall, Raj Bhawan nung High Court of Punjab & Haryana indang obendanger PV Sanjay Kumar tenangzüktep agiba sentong nung tenogo," ta ashi.

Kumar ya Andhra Pradesh High Court nung obendanger ka ama 20008 nungi 2010 tashi inyaka arur 2010 küm iba court nung permanent judge ka kumdaksü.

Pa ya tang tasen tenzüka Telangana High Court nunga obendanger ka ama inyak aser High Court of Punjab and Haryana nung 2019 küm October ita nungi inyaka arua liasü.

CM Khandu-i Major Bob Khating indang kürakyanglu semzüksü



Deobarnü Tawang nung Arunachal Pradesh CM Pema Khandu-i Major Bob Khating indang kürakyanglu semzüksü dang agiba noksa angur. (Tawang, February 14)

Guwahati, February 14 (Agencies):

Deobarnü Tawang nung Arunachal Pradesh chief minister Pema Khandu-i Padma Shri Major Bob Khating indang kürakyanglu ka sayatsü aser Major Ralengnao 'Bob' Khathing Memorial Museum indang nüngshilong azüngtsüogo.

Khating nem Arunachal Ratna award (posthumously) agütsütsü.

Khating nem akhüm agütsütsü nükjiding nung iba museum yanglutsü. 1951 küm Indian sub-continent den Tawang longjemdaksütsü asoshi Khating-i bendanga agüja inyak.

Küm 70 tejakdang iba anogo (February 14) Khating-i India Wako salatsü.

Major Bob Khating ya Ukhrul district nungi Tangkhul Naga nung ka lir aser pai British army nung inyakogo.

World War II mapang Khating-i raraogo aser pai tasüitta raraba atema Military Cross agütsü.

Taoba mapang Arunachal Pradesh sorkari, pa nem akhüm agütsütsü aser bilemtetsü asoshi iba museum yanglutsü aser India atema pai bendanga agüja shilem agibatam iba museum ajanga nüburtem dang sayutsü.

"Tesüiba küm 70 tejakdang iba anogo #India atema Major

Bob Khathing-i Tawang kümzüksü (secured) aser wako salatsü. Tanü, Tawang nung "Major Ralengnao 'Bob' Khathing Memorial Museum" atema nüngshilong azüngja CM @PemaKhandu BJP Ji ajanga Arunachal Pradesh sorkari pa nem akhüm tetushi agütsü," ta Twitter ajanga Conrad Sangma-i lemsatep.

Arunachal Pradesh governor BD Mishra, Meghalaya chief minister Conrad Sangma, Union minister of state for youth affairs and sports Kiren Rijiju aser India indang mezüng chief of defence staff General Bipin Rawat nung matsüngdang Khandu-i iba nüngshilong azüngtsü.

Darrang nung police ka asü

Mangaldai, February 14 (Agencies):

Darrang District kübok Dalgaon Chariali nung bitumen aliba drum tem alua police constable ka dak anenba sülen pa süogo.

Tasüsangji police indang night patrolling team züngsem Abu Bakkar Ali liasü.

Police-i ashiba agi, Honibar ayaterm National Highway-15 kübok Dalgaon Chariali len drum nung bitumen bener aliba truck ka longko meyiptsü merangba mapang truck ya

meküboka lendong ya atalok.

Truck mekübokba mapang, drum tem aluagi Ali mang nung tsük. Ali ya iba tesem nung duty noktaka liasü aser bitumen aliba drum tem alua pa mang nung tsük dang pa kanga mejungi yiruadok.

Idangjisa aritepa Ali ya Mangaldai Civil Hospital-i anir ao, kong doctor temi pa ya Guwahati nung Gauhati Medical College and Hospital (GMCH)-i anir aotsü tetuyuba agütsü.

Ajisüaka, Ali kanga mejungi

yiruba ajanga iba Medical College nung pa taküm meküzmükteti süadok.

Registration no. AS 05C 7923 aketba truck ya Guwahati leni oya liasü aser driver-i gari maziükteti lenmang tiyong nung divider dak tashi agi tsükoxtsü.

"Iba truck nungi Bitumin inoker aliba drum tem tsüka Abu Bakkar Ali dak atep aser pa kanga mejungi yiruadok," ta Dalgaon Police Station nung traffic branch indang officer-in-charge Giyasuddin Goni-i ashi.



February 13, 2021 nü Headquarters Inspector General Assam Rifles (East) kübok Assam Rifles indang Aizawl Battalion den Excise & Narcotics Department-i Mizoram kübok Hnahthial nung Heroin gram 667 apu.

OFFICE OF THE SENSOLIKUM VILLAGE COUNCIL

Date : 14th. February, 2021.

SANGDONGER

16th February, 2021 anogo nung Sensoliküm sanger inti nübo adoktsü, anungji nisung ajak pei ataba plot (tesem) nung anepdang 8:00 AM shitak nung ataa alitsü metetdaksür. Ar-amang mangatettep aliba ajak Council-i lemtettsütsü. Shiba marulir, joko yimteni pa atema khuret mabentsü.

Sd/-
K.LIMA IMCHEN
President.

Sd/-
S.CHUBA TZUDIR
Secretary.

Rahul Gandhi-i Assam nung Congress atema nüboyimba maparen tenzüksüogo

Sivasagar, February 14

(Agencies): Assam nung Assembly election agütsü aliba atema Congress lennir Rahul Gandhi-i nüboyim sentong tenzüksüogo.

Assam nung assembly election dak tangloker Prime Minister Narendra Modi aser Home Minister Amit Shah nati semdangba sülen Congress lennir Rahul Gandhi-ia tanü state semdangogo.

Deobarnü Rahul Gandhi-i Assam kübok Sivasagar nung lokti sentong ka nung aden.

Iba sentongji Sivasagar Boarding Field nung ayonga agi aser nisung aika adenshi.

Sentong nung Rahul-i o jembidang Centre aser State nung BJP-i aniba sorkartem aitsü.

BJP aser RSS ajanga Assam nung aliba telok balala tsüngda telemsa adokdaksüogo ta pai metetdaksü.

Rahul-isa Citizenship Amendment Act (CAA) indang jembidang "ozü party-i Assam Accord nung aliba onük ajak kümzüka ayutsü aser State nung sorkar aküm nungbo CAA mebenoktsü" ta ashi.

Tanü sentong nung Rahul den party tongti lennirtemi 'No CAA' ta zülua aliba 'gamocha' enok.

Taoba hopta Home Minister Amit Shah-i COVID-19 vaccine agütsüba maparen tembangba sülen CAA mapa küma tenzüksü ta ashi.

"Assam Accord ajanga Assam nung yimjung bener aru. Congress-i Assam Accord nung lateta aliba onük ajak kümzüka ayutsü" ta Rahul-isa ashi.

Assam Accord ya State kümzüka ayuba lir. Alima nung tashi kechaia Assam meraksatsütetsü. Assam Accord raksatsütsü meranger aser tesempatep prokshirtem nem Congress party aser Assam nung külemi telangzüba tajung agütsütsü" ta paisa metetdaksü.

Rahul Gandhi-isa Assam Chief Minister Sarbananda Sonowal luja "Assam nung pei nübortem ola angar chief minister ka nüngdaker" ta ashi.

"Tang teinyakdak Chief Minister yagi Nagpur aser Delhi



Rahul Gandhi

nungi tuyuba ama inyaker" ta paisa shisem.

Prime Minister Narendra Modi aser Union Home Minister Amit Shah nati Sivasagar semdangba aija Rahul-i "Centre-i linük nung shishilembar tongti ana dang Assam indang ali rongsen and PSUs yokdoker" ta ashi.

Congress party nem sorkar akümtsü maongka agütsüra, süngolu nung mapa inyaker indang anogoshi taa Rs 365 kümstsütsü, ta paisa ashi.

"Assam nung süngolu nung apa inyaker kati anogo nung Rs 167 angur saka Gujarat nung shishilembartemi süngolu angur. Onoki Assam nung süngolu nung mapa inyaker nem anogoshia Rs 365 agütsütsü nangzüker. Senji kong nungi arutsü ta süra Gujarat shishilembar ket nungi angutsü" ta Rahul-isa metetdaksü.

Congress lennir tejen aser taoba Assam Chief Minister, Tarun Gogoi bilemteta Rahul Gandhi-i "taoba chief minister Tarun Gogoi lenisüba kübok Congress sorkari Assam nung ozüng alema inyakba anendaksür yimjung bener aru" ta ashi.

"Congress-i Assam nung longjemdaksü. Tesüiba mapang nisung ka kidangi taküm shilangtsü asü masü ta terata liasü" ta paisa shisem.

Assam nung Congress-i 'Axom Basaon Ahok' (Come Lets Save Assam) campaign tenzükogo. Iba ya Assam nung BJP sorkar atsüngdoktsü atema alizüng nung inyaker.

Taküm April-May meta züngsem 126 agi akümba Assam Legislative Assembly indang election agütsü.



TIR YIMYIM YIMOBILEM (EDITORIAL)

DIMAPUR TENTONÜ, TSÜKLAI (FEBRUARY) 15, 2021

KAISER MEYONG

Yisu alima nung alidang asenok alima nung senso tajung ka kuma inyaksü ashiba mapa kaji, asenoki ajangzüktetba nungi Tsüngrem nem dang masü saka alima yimten mapa asoshia Kaiser nema kechi tagütsütsü ali, iba tenla aser saruji agütsütsüla ta ashiba o ya asütsü. Tetezü, asenoki arogo nem asenoki ajangzüktetba nungi ter shilem agütsüba amato yimten nema yimten mapa asoshi agütsütsü tim. Ajisüaka, tanü asenoki tenla mesüra saru agütsüba maparen ya sükdangra, asenok aikati arogo nema aser yimten nema shitak magütsür ta sükdangtetsü. Atangji, arogo nem agütsüba jibo Tsüngrem nem agütsür ama bilema agütsür asünungji, tagütsür katibo ter shilem dang nung teimba tenlar, ibayongji item tenla sentemji amshia arogo mapatem inyaker. Iba kasaji asenoki yimten nem asenoki ajangzüktetba nungi ita shia agütsüra, arogo ama yimtenia iba sen jagi nübortem asoshi terenlok mapa inyaksütsü. Atangji, asenok Nagaland nung alir Naga nunger ama Scheduled Tribe purtem dang nungi yimteni mesarur dang ashi, tanga state nungbo senso shia dang pei mapa nung ajangzüktetba nungi yimteni shilem 'Income tax' agir aser iba senji yimten mapa nung amshir. Atangji, income tax agütsütsüba jibo pei pei senotsü ajangzüktetba yari agütsütsü lateta lir, anungji arogo nem ajaki kasasa ter shilem agütsüba ama masü, aika ajangzüktetertem asoshi shilem tuluba aser ishika ajangzüktetertem asoshi shilem tilaba ta latetja lir. Asenok aikati government tenzükertem ita sen mesüra contract mapa inyakba nungi department-i shilem ka agizüka ayubaji 'income tax'-a ta bilema alitsüa akok saka itemjibo pei pei department mapatem asoshi agizüker dang, saka kodang asenoki income tax agütsütsü tenzükdir, idangjibo asenoki inyakba mapa nung amshiba mesüra endokba sen ajak nungi masü saka asenok tajangzük anguba nungi dang meshitsü. Iba jagi nisung kati ita nung mesüra küm nung sen kwi ajangzüktetra ibaji sayur. Iba saru ajanga yimten senpongi sen aitba dang masü saka sensosangertem ajak ochishia yimten aser lokti mapa nung shilem agitsü akanger. Tatishitsü agi, ni küm nung sen crore ka tajangzük angur, anungji iba nung jagi yimten nem income tax noklang nung pongo shilem (5%) agütsütsü lateta lira, kü shilemji sen lakh 5 asütsü. Ajisüaka, ni yimten dang lakh 90 miima yur, ni küm nung sen lakh ter dang ajangzüktetba sayur sen meyerijang 50 dang agütsüra, niji ochimashir asütsü aser sen lakh 90 ji miima ayutsü atema bank nung masü saka kü ket nung ayutsü. Black money-ji ibaji lir. Tatsüba agi, saru magütsütsü tebilemba nung pei sen bank nung meyui amshibaji özügi memelaba sen akümer. Item ama senji nokdangsü atema Narendra Modii aniba BJP government-i taoba küm sen note melenba 'demonetization' mapang asenoki ajuruogo. Iba mapang takartem sen tayudak maka timtemba aser Naga nunger dena sen crore junga tanga state nungi tayimtsü hire ser aruba otsü asenoki angashiogo. Tetezü, senso kati pei mapa nungi ajangzüktetba nungi shilem ka yimten nem agütsüba özüng aser inyakyim jagi, yimten senpongi sen aitbaji dang masü, pei mapa nung ochishia inyaksü asoshi azüoker. Iba jagi pei ajangzüktetba senbo küm nung lakh ter dang saka asen meyong rongsen bendenbajibo crore aika jenjang ta nisungi temulung melemtetsüsa atalokdang, government nungi CBI aser NIA ama bushisüngdangertem yoka bushisüngdangdaksür. Ano, asenoki ajangzüktetba nungi arogo nem ter shilem agütsüba ajanga arogoji asen meyong ama kuma meima arogo mapa ajak nung shilem agiba ama, kodang asenoki yimten nema asenoki aaba nungi shilem ka ochishia agütsüdir, idangjibo government-ji BJP government mesüra Congress government ta masü saka asen government asütsü aser government sentong ajak takok ngua inyaksüsa asenoki shilem agitsü, kechiyong government mapaji asen sen agi inyaker aser government ita sen agütsüba senji aseni agütsüba sen agütsür. Idangjiang, ano senso ka temeten aser tashi tuluba kuma ola adoktetsü. Kaiser nem agütsüba senji Kaiser takar akümtsü agütsür masü saka asen lima tangar tsükchirtem ket nungi kümzüka ayutsü aser nübortem taküm junga alitsü asoshi sentong balala atonga inyaksü agütsür. Kaiser-ia aji metetsüla aser asenok nübortemia Kaiser nem shilem kabosa agütsü tenzüksü mapang agi tongogo. Ajak dang tongtibangtibaji asen arogo, asen lokti aser asen yimten nung asenoksasa asen kibur kuma khuret abentsüba jibo lir. Kibur aküm nungang arogo, lokti aser yimten meyong kiojen aser rongsen apayua amshitsü aser teti asen yimten, arogo aser loktiji tashi itta yutetsü. Atangji, kibur akümtsüba jibo angati mapa masü yangji rongsen aser nubo tenla lir. Senso tajung katibo item tenlaji agütsütetsüla aser kibur kuma pei yimten, arogo aser loktiji anepalutetsüla.

OLEMSABANG

MOPUNG PUTU DEN APET AROGO TENYABA MAPA

~ Dr. Tinumeren Ozüküm

(Yashi adok nungi...)

2. Sannükba vs Terenlok mapa

Tsüngremi ajaba tejangja akar arogo nung inyaksüba jibo kanga tongtibang. Tsüngremi pa melen nokdaksü ajtet ta tejangja tangatetba nung tenzüksüla. Yisu-i nungloktsüba ama tenyaba mapa nung santem mesüba ya lir. Kodang tajaba tejangja den Tsüngrem den tezüngzüktepba kadir tanga terenlok (development) kisung nung tenük meyoki, nütsung nübortem Yisui mulungba leman nung anitetsü jangratsü. Saka tejangja tajaba makara pei asoshi konang aser tetoshi leman bushitsü, idangji sannükba mapa masü, terenlok mapa nung temulung tali agütsütsü, tat. agi., tenlaki, guest house, para ki mesüra mission field nung school tuluba yanglutsü ta tangatetba nung inyaksü. Arogo tajabaji Yisui ochi leman sayuba nung nübortem anitetba aser aji Lai kuli tejangja.

Kibuba Tsüngrem Sannüker ka ama Tenüngsang Ken 23 nung shia lir. Tenüngsang Ken züluri Yahweh Tsüngrem dak temulung lemtetba indang tatishitsü asem amshia sayur. Mezüngbuba nung, Sannüker ka ama; tanabuba nung, Lenir ka ama; aser tasembuba nung, Benjong kibur ka ama shia lir. Aser iba Sannükba khuret nungji 'kümzüka' aser 'abensa agütsüba' tatishitsü amshia sayuba angur. Iba Sannükerji Yisu Khrista ta Yohan 10:14 nung kuli agüja angutsü. Sannükba wadang tarokba aser tejangjaba nung angatetsü Yohan 10:3-5 nung zülua angur. Santemi Sannüker den koba jenjang nung tesendaktep ayur ta süra sannüker ola santemi angateter...pa/la sülen anidaker...pa/la ola metet, Iba nungji sannüker aser san tesendaktep jangja jangja angatetter. Sannüksang ola angashidang san teloki iba ola jangjatsü parnok kolak ajungketa angatsü meranger. Par sannüker ola asü masü ta jangjar külenang anitaker. Ola angashir aser jangjar sülenang iba ola sülen tashi anga pai/lai leniba lenman nungji anitaker.

Sannükba wadang nung temeshi leman den, tasü amman ayongkhüm jenjang balala aika ajangshia jajatsü. Saka sannükeri Kibuba nungi anguba shisatsü nung pai/lai par/lar san telok pa/la anasa anir, pa/la mechi aser ajok teyari ajanga, tatem tashi pa/la aser par/lar san telok anisüngzükdak ki tonga anir arur. Tenüngsang Ken 23:6 nung ashiba ama pa/la arishi piyong 'tajung aser taochi' teyari Kibuba nungi agizüka sannükba wadang nung jajatsü tuyur.

3. Tashiyim vs Sensaksem

Temalen shisemba ama tanü mopung putu nung nisung ka kisügi ashiba, bilemba aser angatetba nung takok aser temeten mangutsü, saka nübortem tangatetba balala ajanga aser külemi ochi bushiba nung akhümtsübu agütsütepba inyakba nung telungjem adoker, aser takok angur. Tanü putu arogo aser lokti aika nung ochi masü, pei temeten bushia özüng aika yanglur aser iba özüngji nübortem nem shitak amai agütsür. Saka shin o ka nung ashiba ama "All rights are not truth" shitak ajakbo ochi masü, anungji arogo aser lokti inyakyim nung kodang nisung ka kisügi ashiba aser angatetba nung özüng yanglur jajadir idakji tamakok alutsü. Arogo aser telok nung mangatettep aser tsükchitep dang adokdaksü. German nunger philosopher Jürgen Habermas-i ashiba agi kodang goal oriented (nükjidong tongtetsü) nung dang lokti anitsü merangdir idakji tashiyim mesüra tim masüba amshia takok kisung nung rangloker anitsü merangtsü, idangji tanidaker o lenir na tsüngda mangatettep adoktsü. Anungji communicative action (angatettepa inyakba) yimya nung kati ka den sensaksemba (dialogue) yimya nung lemsatepa anira iba jagi tangatettep aser ochiba leman adokdaksür. Kati ka ajungmesotepa, yaritepa inyakba ajanga aroki lungjemer takok angur aser loktiji tejakleni aor.

Tetenzüklen shisemba ama tanü mopung putu tamangba yimya balala otsütem mopung osang balala ajanga nübortemi meteter. Anungji iba mopung putu nung arogo aser lokti nung lenir kisung tebilemba nung masü, saka aroki ibai ochi leman ta shitetba nung nübortem anitsüba jibo kanga tongtibang. Talisa, tanü teraksa lima nung arogo ochi nung nokdaksüba jibo aser ainkar ola agütsütsüba jibo Laishiba nung tera yanger nübortem dang Yisui sayuba ama, tashiyim lenisüba ama masü, saka khuret abenba yimya nung anitsüla kechiaser arogoji meimchir shia temulungjang lir. Arogo tereprangtsü tobur junga yanglubaji dang masü, saka sannüker yimya ama santemi ola angateta chiyungtsü shitak putu den apet agütsütsü tim. Tashiyim özüng nung masü, saka sensaksem (dialogue) yimya nung angatettepba aotsüba jibo kanga tongtibang ta angatetdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Televangelist, Frederick K.C. Price Covid tashidak agi süogo



Crenshaw Christian Center Arogo nung tekülem sentong agiba sülen Frederick K.C. Price (tejaklen mena alisang), Allen Crabbe, Angel Price, Apostle Frederick aser Dr. Betty Price nunger tangokba noksa nung angur.

February 14, 2021: Inglewood, California nung Arogo tuluka tenzüksang aser television ajanga Khrista osangtajung proksang, Frederick K.C. Price, Hokolbarnü (February 12, 2021) coronavirus tashidak agi süogo; pa arrshi küm 89 liasü.

KC Price, Los Angeles anasa aliba Torrance Memorial Medical Center nung süogo, ta otongdar, Holly Baird-i metetdaksü.

"Pai rara tajung raraogo aser tatem maka taküm ajangzükogo," ta par kibongi

Facebook post ka ajanga metetdaksü.

Taoba hopta tetenzüklen Arogoi Instagram post ka ajanga, KC Price coronavirus tashidak agi shiranga hospital-i anir oa mongdar, ta sangdonga Arogo züngsemtem dang sarasadem nung pa bilemtettsü mepishia liasü.

Price tepokpok, temelungjang aser tezüngjang nung timtem adoka liasü.

1973 küm Price-i Inglewood, California nung Crenshaw Christian Center Arogo tenzüka liasü aser tangbo iba Arogo

nung züngsem 28,000 dak tema kümogo.

Tsüngremi mangdang ajanga pa den jembiba nung ajemdaker 1978 küm nungi tenzüka Price-i tekülem sentong agibatemi Ever Increasing Faith Ministries kübok television nung sayua liasü.

2009 küm Price-i iba Arogo nung pastor nungi anisüngzük aser par jabaso nem pastor mapa nunglokja liasü.

Price-i pa kinüngtsü, Betty den chirnur pezü, semchir 10 aser tanaben semchir pezü toktsür alima nungi pilaogo.

ANOGO ABEN TSÜNGREM DEN

Iba ama mapang ka asoshi

Ester 4:4-17

Koba ama küm ka nung nai liner nai bilemdangogo ma? Iba tejen küm tajung ta asü-alimaji yimjung aliba ama, taküm mera meilungi aoba? Iba ama mapangji alangteptsü onük lir kechiaser Temenenji teti alir.

Ester mapang tamajung ka nung liasü. La Yihudatsür ka süaka, Medes ser Persia chubatsür aküm. Shisatsü tamajung atenba Hamani lar nübur sempa aser parnok ajak samatsütsü tasa yanglu. Esteri shimtsüba ka liasü. Lai chubatsür korangji agitsü asü, mesüra la taküm lendongi ia lar nübur kümzüktsü merangtsü. Tsüngremi iba ama mapang ka asoshi la chuba menden nungji toktsü aser pai mulungba inyaktsü yimla.

Azü tokshiba melira, Tsüngrem aser Pa o tsübuba lira, TV makara azünga aliba mapang ishiba lira, aser teraksa adoktsü sen tera dang kara kümji tajungba alitsü ta asenoki meimlatsüla. Alima kechi koma lir iba Tsüngremi asenok lidaktsüner. Idakji tangar ka mali. Pai item mapang metet aser Pai asenoki metetba dang nungi tajung Pai asenok metet. Pai asenok yangi yutsü aser asenok kechi aji Pai yanglu kechiaser asenok asoshi kechi tajung aser Pa yimli nung asenok ajanga Pai kechi inyaktsü Pai metet.

Tsüngrem, iba anogo ni ne chir ama alitsü Nai mulungba inyaktsü mapang tajung ajangzüktsü kü dang yariang. Yisu ajanga mepishir. Amen.

UK nung Arogo 500 dak temai Hong Kong nungi arurtem agizüktsü

February 14, 2021: UK nung Arogo 500 dak temai Hong Kong nungi Khristantem densema UK-i arua alitsüpurtem yaritsü atema website tasen ka tenzükogo.

UKHK ta ajaba website nungji bendanglen nungi arurtem aser UK sensotem na tsüngda telongjem alitsü aser akhümtsübutep alitsü atema shia lir.

Iba website nungji 'Community, A local Church' ta ser section ka lir, aser iba nungji Hong Kong nungi arurtem yaritsü atema renema aliba Arogotem sayuba map ka densema lir.

Iba website nungji yamai shia lir, "Cantonese oshi jembiba Arogotem aser English jembiba Arogotem nung nenok pelaa agizüktsü. Map nung aliba Arogotem nunga Hong Kong nungi arurtem UK-i arua jenoka aliba nung yariteptsü atema sign süa alir volunteers aika lir."

"Arogo ajakji balala, ajisüaka item Arogotem nung Laishiba zünga külemi sarasadem, social activities atema telok balala lir. Tatishitsü agi foodbank lir, kong nüngdakba mapang nung emergency food supplies angutsü," ta website nung shia lir.

"Arogo züngsemtem den adentsü atema na Yisu Khrista sülen anidaker ka asütsü menüngdak; nisung ajak pelaa

agizüker! Map nungji na anasa aliba Arogo ka bushia oang aser medemer ayimtsü mesüra kibong kar bushitsü atema nai teyari angutsü," ta site nung shia lir.

Iba website tanga sections rongnung ki yanglutsü, shisaliok bushitsü aser healthcare services indang shia lir.

Taküm nisung 130,000 shi Hong Kong nungi UK-i arutsü, aser iba atemaji sorkaria asalentong yanglua renemdar.

UKHK tentetsang aser Director, Dr Krish Kandiah-i, "Continent ka nungi kati aotsüji tasak, talisa alima nung wara aliba mapang nung iba ya tayongzükba tuluka lir," ta metetdaksü.

"Ibayongji onoki London nung nisung tasentem pelaa agizükner aser ibaji ajanga Great Britain tajungtiba agi sayaner," ta paisa metetdaksü.

"Tanga mapang ka asü nungbo onoki kenten sentong, tsüngsangba sentong, sangro züngtepba, film sayaba, football asaya, picnics aser supper clubs ama sentong balala ayongzüka agila. Ajisüaka wara aliba ajanga onoki Zoom calls aser video conferencing ajanga dang sentongtem agitsü," ta paisa metetdaksü.

Hokolbarnü London nung tongti putir, Sarah Mullaly-iyaria St Martin nung iba website tenzüka liasü.

Khristan dangi meyipba Dalit nunger nem quota magütsütsü: Law Minister

New Delhi, February 14 (Agencies): Tawa India nunger Parliament- Rajya Sabha nung tasüngdangba ka langzüdang Union Law Minister, Ravi Shankar Prasad-i, Islam yimsü mesüra Khristan yimsü dangi meyipba Dalit nunger nem reservation tajangzük (quota) magütsütsü, ta metetdaksü.

Minister-isa, Islam yimsü mesüra Khristan yimsü dangi meyipba Dalit nunger nem Scheduled Castes (SC) atema reserve süa aliba constituency nungi Parliamentary elections mesüra Assembly elections

nung metoktepdaktsütsü, ta metetdaksü.

BJP MP, G.V.L. Narasimha Rao-i asüngdangba langzüdang Law Minister-i, Hindu, Sikh aser Buddhist yimsü agizükertemi SC reserve menden nungi election nung tokteptettsü aser reservation tajangzük angutsü, ta metetdaksü.

Prasad-i ashiba agi, linük temzüng (Scheduled Castes) Order Para 3 nung yamai shia lir, Hindu, Sikh mesüra Buddhist yimsü nungi masüba nisungtem Scheduled Caste asütsü temsüa mali. Minister-isa, SC/STs nungi

Islam mesüra Khristan yimsü dangi meyipertemi Parliamentary election mesüra Assembly elections nung tokteptsü atema Representation of People Act yanglushitsü asoshi benoka mali, ta metetdaksü.

2015 küm Supreme Court-i, kodang Hindu nunger kati Khristan yimsü agizükdir, Hindu yimsü nungi anenba ajanga loktiliba aser rongsenkettsüng tsütsü timtem ajurura, pa nem teküzmükba agütsütsü menüngdak; ibayongji pa Scheduled Caste asütsü metemsür, ta oshidang agüja liasü.

Congo linük nung Islamic kiralongrartemi Khristan 10 tepset

February 14, 2021: Congo linük nung kiralongrar telok-Allied Democratic Forces (ADF)-i Khristan 10 tepset; iba telok yagi Khristantem dak azüker, apur mesüra tepseter, ta International Christian Concern (ICC) osang ajanga metetdaksü.

"Hombar aonung (February 8, 2021) Khristan 10 shi tepset. Iba ya Islamist telokADF züngsemtemi lir," ta Beni Territory nung Deputy Administrator, Rosette Kavula-i metetdaksü.

Iba jakdang anasa aliba

yim, Mabule nunga ADF kiralongrartemi Khristan 12 lepseta liasü.

Tawa UN News report ajanga ashiba agi, 2020 küm kija nung ADF teloki nisung 849 tepsetogo. OHCHR otongdar, Marta Hurtado-i, iba kiralongrar telok yagi linük nung nütsüng aika nem timtem agütsür; iba linük nung nütsüng shilem 80-90 bo Khristantem lir, ta metetdaksü.

"Linük nung meimchir temedentem anema inyakba aser International humanitarian ozüng alema

inyakba ken o aika rongnungi ken o kar dang bushisüngdanger aser temerenshi ajema agütsür, ibayongji linük nung item ama tatalokba kanga bulur. 2020 küm ADF-i Beni prison amakdang jail nungji puoka alir nisung 1,300 dak tema jena liasü," ta paisa metetdaksü.

Sorkari ADF telok mazüoktetba ajanga Khristantem kanga timtemer; anungji Congo linük nung asen adianutem atema maneni sarasademjang, ta paisa mepishia metetdaksü

OLONG PAITEP # 5725

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
							25			

TIPIEN

1. Saku - (4)
 6. Songjen - (7)
 7. Mali/Tazung - (4)
 9. Tasen apok - (6)
 11. Songtem - (3)
 13. Ata liasü - (5)
 16. Tzünglu den külemi tsüker - (3)
 17. Aso tila - (6)
 20. Tashi maküm - (4)
 24. Tenüing kasa jatepba - (7)
 25. Ki yangluba oset - (4)

LANGTSÜNGLEN

1. Taksep - (3)
 2. Langtem - (5)
 3. O tamendaktak - (4)
 4. Nütsü tebuba - (3)
 5. Anüingdang tesangwa - (3)
 6. Apitet - (5)
 7. Yagi jungdaksür - (4)
 8. Anogo semer ka - (3)
 10. tatsü - (3)
 12. Tēbūr kidong aser zünga kasa tsüingda jatepba - (4)
 14. Pela agizükba tapu ka - (5)
 15. Tenüing atet - (3)
 18. Mejanga onü - (5)
 19. Talak techira - (4)
 21. Maneni - (3)
 22. Nübo teyi - (3)
 23. Meshi - (3)

OLONG PAITEP # 5724 TELANGZÜBA

TIPIEN :

2. Anükalem, 4. Mesak, 5. Apet,
 9. Meimtep, 11. Posü, 12. Patak,
 13. Tekettsü.

LANGTSÜNGLEN :

1. Kümdang, 2. Ayak, 3. Leptep,
 6. Sati, 7. Yiar, 8. Sangküm, 9. Metsük,
 10. Mazü.



Revival mapang nung Mr. Diemo-i Revival ken ana (2) nung tai atenba agi pa medemer Mr. Bobo-i artsür.

- Mr. Bobo** : Temba Diemo ! Nai Revival mapang nung ken ana nung teti tai atener, ya sürbo ken kaküt nung koma zülua ali jungjunga repringshir shidakba nung tenang.
- Mr. Diemo** : Masüa, ni teti shidak nung dang atener nung koda?
- Mr. Bobo** : Masü, nai tesünep aser tepela kü nülai bushiba ta atenba ken nung, tekong ka nung kü nülai bushiba, aser tekong ana nung kü nülai yongyaba ta zülua lir, saka nai anapronglaji meyokteper kü nülai yongshiba ta atener. Nür tanur-i , oba na aji kechi yongshiba ken yamaji atener ta asüingdangra nabo kidong tali majungtsü.
- Diemo** : Ajibo shidakdang nung koda! Mapang maliba agi anapronglaji meyokteper kü nülai yongshiba ta atener adi. Kaküt nung koma zülua ali yamaji atentsüla-ato? Revival kensa yamaji atener na?
- Bobo** : Nai ano ken ka nung tangarbo tsükchirtüm den puteptsü mapangji tongogo ta atener, saka nabo tetsürtüm den puteptsü mapang tongogo ta ang atener.
 Na ya kechi tesüingmangtsü ken atener? Ken nung ashibaji, Tetsürtüm indang ashir masü, tsükchirtüm den puteptsü indang ashir adi. Ken kaküt nung zülua aliba amaji shidak nung tenang, süra nübuttsü-i, I love you my dear ta ashitsü aser ajak den putepa alitsü.

Lili zülur S Medem Kichu, Kohima

TANÜBO NAI LANGZÜANG

Q. Square kilometer array telescope ya ____ linük nung yanglutsü.

A.Africa B.Australia C.Africa and Australia D.None

===== (Taruba adok nung onoki langzünsü)

YASHI ADOK TELANGZÜBA : 2004

Happy Birthday

TENÜNG
 Talidak
 Tasoba anogo
 Küm

: IMTITOLA
 : Mokochung
 : February 15
 : Pezu (4)

Semchir Tutola küm pezü ajungba anogo tashi Tsüingremer taochi ma nung anir arunung Tsüingrem tenüing asanger. Asüing nungi tenzüka küm 5 pungu nung ajemoka mera tasen nung jaja aodang mokoktetsü sa timtem aser shisabulu ajak nungi kümzükan ta onoki asen teyanglur Tsüingrem dang sarasadentsür.

Tsüingremi semchir Tutola taküm areshi talang moajangma.



- Temeim oja,oba, otsü, obu, aser Narola kinüngertem.

NAI-A YA METETTER MA?

ALIMA NUNG NÜNGTUGU SPORTS BRAND KAR: FEBRUARY 2021

(Yashi adok nungi...)

5. New Balance

- Worldwide sportswear sales: \$4.1 billion
- Main sports product: Shoes
- Founded in: 1906
- Based in: Boston, Massachusetts, USA
- Owned by: New Balance, Inc.

6. Lululemon Athletica

- Worldwide sportswear sales: \$3.4 billion
- Main sports product: Yoga apparel
- Founded in: 1998
- Based in: Vancouver, British Columbia, Canada
- Owned by: Lululemon Athletica, Inc.

7. Columbia Sportswear

- Worldwide sportswear sales: \$2.9 billion
- Main sports product: Outerwear
- Founded in: 1938
- Based in: Beaverton, Oregon, USA
- Owned by: Columbia Sportswear Company

8. Asics

- Worldwide sportswear sales: \$2.7 billion
- Main sports product: Shoes

SUDOKU # 5767

	5			1	2			8	3	5	4	7	6	2	9	1
9				5		8		1	7	4	3	9	2	6	5	8
	3	1	2	8	7	5		6	2	6	9	1	5	8	4	3
		3	5			9	2	4	9	1	6	8	2	4	3	7
		4				3			7	5	3	9	6	1	8	4
	8				9			7	4	2	8	5	3	7	1	6
3		8	9	7		4		2	5	9	2	6	8	3	7	1
	4		8	3	2	1		9	6	8	1	7	4	9	5	2
	7	9	1	6				8	3	4	7	2	1	5	9	8

TELANGZÜBA # 5766

OJANG LUTEP # 5313

- JAYIMK :
- UNNG :
- KSMAÜ :
- GUDAANNG :
- IBNUNGO :
- BOKIK :
- GNUN :
- AKMSÜ :
- GANU :
- UNGBTAJA :

OJANG LUTEP TELANGZÜBA # 5312

TEJAK TEREPRANGTSÜ TAJUNGJI AKAJI NÜKSHIR SAKA
 SHISATSÜ TAJUNGJIBO AJAKI MEIMER

TAN HOPTA ATEMA - KOMA SÜLA ?

Q. 1963 küm 1st December sülen Nagaland nung arua alirtem nem Nagaland nung dokan amentsü, taxi aser auto rickshaw anishitsü permit magütsü nunga koma süla?

Olong 20 shi nung February 19, 2021 tashi nung iba telangzüba ya onok dangi (e-mail - tiryimiyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.

PM Modi-i Tamil Nadu nung sen crore aika indang projects tenzüksü



Chennai (Tamil Nadu), February 14, 2021: Amongnü Chennai nung Ato kilonser, Narendra Modi-i army nem linük nung yangluba Arjun Main Battle Tank (Mark 1A) tanks agütsüba sülen tangokba noksa nung angur.

Chennai, February 14 (Agencies): Amongnü Ato kilonser, Narendra Modi-i Army nem linük nung yangluba Arjun Main Battle Tank (MK-1A) tanks agütsü aser Tamil Nadu nung Railways densema projects aika tenzüksüba den külemi project balala atema lung azüngtsüogo.

Amongnü Modi-i tenzüksüba projects rongnung sen crore 3,770 indang Chennai Metro Rail Phase-I extension densema lir.

Chennai nung aliba Nehru Indoor Stadium nung agiba sentong nungsa Ato kilonseri Army nem Arjun Main Battle

Tanks agütsü.

Modi-isa Chennai Beach-Attipattu fourth line aser Villupuram Cuddalore-Mayiladuturai Thanjavur-Mayiladuturai-Tiruvarur Single Line Sections nung Railway electrification tenzüksü.

Modi-i IIT Madras nung Discovery Campus yanglutsü atema lung azüngtsü. Iba project mezüngbuba shilem nung sen crore 1,000 shi indoktsü.

Iba sentong nung Tamil Nadu Angh, Banwarilal Purohit, Chief Minister K Palaniswami, Deputy Chief Minister O Panneerselvam, cabinet

minister tem, AIADMK nungi lenir, M Thambidurai aser teloktep party tem nungi lenirtem-a densema liasü.

Amongnü anepdang Ato kilonser Chennai nung aliba airport tonga aruba sülen helicopter ajanga INS Adyar-i ao, aser iba nungjagi sentong agitsü tesemi gari ajanga oa liasü.

Kasa sentong nung Ato kilonser Modi, Palaniswami aser Panneerselvam nungeri taoba mapang Tamil Nadu nung chief minister ana- asür M G Ramachandran aser asür J Jayalalithaa na nem akhüm agüja liasü.

Tapovan Tunnel nungi ano tasü mang 2 agitet; asür ajak agi 40 jungogo

New Delhi, February 14 (Agencies): Amongnü anepdang züngia ketdangsertemi Uttarakhand nung aliba Tapovan tunnel nungi ano tasü mang ana agitetogo; tang tashi iba tunnel nungi nisung 30 madokteti lir, ta ketdangsertemi metetdaksü.

February 7, 2021 nü Uttarakhand kübok Chamoli district nung rürjep tulu anenzüka aluba ajanga tzümetsüng lendong ataloka liasü. Iba lendong atalokdang

nisung aika Tapovan-Vishnugad hydel project nungji mapa teinyakdak liasü.

Tang ano tasü mang ana iba tunnel nungi agitetba densemabo iba lendong nung asür ajak agi 40 jungogo, ta ketdangsertemi metetdaksü.

Amongnü agitetba tasü mang ana nungjagi kabo Tehri district nungi Narendra Nagar lir ta jangjaogo, ta Chamoli District Magistrate, Swati S Bhadauria-i metetdaksü.

Ano külen, Dehradun nung

aliba State Emergency Operation Centre nungi ketdangsertemi ashiba agi, Indian Institute of Remote Sensing nungi scientist temi anünglen nungi survey agiba mapang nung Rishi Ganga nung rürjep anenzüka alua tsükba tesem nung rürjep agi awatsüng ka kümogo, ta metetdaksü.

Central Water Commission (CWC) Chairman, Saumitra Halder-i ashiba agi, ibaji metong nung metre 400, lenden nung metre 25 aser tarokji metre 60 lir.



Agra, February 14, 2021: Valentines Day anogomong nung raliwalirtemi Agra nung aliba Taj Mahal semdangba noksa nung angur.

BJP nem takok ngudaktsütsü atema Congress-i tokteper: Manish Sisodia

New Delhi, February 14 (Agencies): Amongnü AAP lenir aser Delhi Deputy Chief Minister, Manish Sisodia-i, Congress-i BJP nem takok ngudaktsütsü atema election nung tokteper, ta ashi.

Gujarat nung taruba local body election nung tongti tetoktepertemji BJP aser Aam Aadmi Party na lir, ta Manish Sisodia-i ashi.

Surat nung raodshow agitsü lia Deputy Chief Minister-i, Gujarat nung nüburtemi Aam Aadmi Party (AAP) ya yimtenren tsütsü tashitait ta bilemer, ta ashi.

Municipal corporations trok-Ahmedabad, Vadodara, Surat, Rajkot, Jamnagar aser Bhavnagar - nung elections February 21 nü agitsü.

Iba dak alia February 28 nü Gujarat nung tanga municipalities, district panchayats aser taluka panchayats elections agitsü.

Delhi Chief Minister, Arvind Kejriwal-i aniba AAP-i tang mezüng Gujarat nung local bodies election nung tokteptsü, aser item elections atema Sisodia-i Ahmedabad, Rajkot

aser Surat yimtitem nung roadshow agiogo.

"Gujarat nung local body election nung BJP aser AAP na tsüngda tokteptsü aliba atema ni pelar. Nüburtemi Delhi nung Kejriwal-i yimsüsüba nung rangloker pa nem maongka agütsüner," ta Sisodia-isa ashi.

AAP leniri ashiba agi, pai Ahmedabad aser Rajkot yimti na semdangba sülen tang Surat semdang, aser item yimtitem nung nisungtemi pa dang parnoki BJP agi laktetogo aser BJP nem tamakok ngudaktsüner ta shiogo.

Paisa, "Congress-i BJP nem takok ngudaktsütsü atema elections nung tokteper. BJP yaria takok ngudaktsütsü atema ibaji asalentong ka lir," ta ashi.

BJP tamakok ngudaktsütsüji Congress masü saka AAP lir ta nüburtemi angatetogo, ta pai ashi.

"Gujarat nung nüburtemi BJP-i state nung aliba local bodies nung küm 25 tashi yimsüsüba aser Delhi nung AAP-i küm 5 dang yimsüsüba naji medemdang, aser parnoki tepilaji reprangteter," ta paisa metetdaksü.

Lenirtemi Pulwama nung asür CRPF sepaitem nem akhüm agütsü



New Delhi, February 14 (Agencies): 2019 küm February 14 nü Pulwama nung kiralongrartemi CRPF sepai 40 pokseta südaktsüba sülen Amongnü (Feb 14) küm ana jungogo, aser iba anogomong nung Union Home Minister, Amit Shah, Congress lenir Rahul Gandhi aser tanga lenirtemi iba lendong nung asür sepaitem nem akhüm agütsüogo.

Jammu & Kashmir kübok Pulwama district nung gari ka nung IED bomb sünga bener CRPF convoy amakba atema Pakistan nung amenoka aliba kiralongrar telok- Jaish-e-Mohammed (JeM) -i tenüng agiogo.

Iba lendong nung asür CRPF sepai 40 nem akhüm agüja Union Home Minister Amit Shah-i, parnoki tasütait tanela sayua linük atema taküm tenla agütsübaaji India linüki kodanga mamatoktsü, ta metetdaksü.

Shah-i twitter ajanga, "2019 küm iba anogo nung Pulwama amakba mapang nung taküm tenla agütsür tasütait nisungtem nem ni akhüm agütsür. Parnoki tasütait tanela sayua linük atema taküm tenla agütsübaaji India-i kodanga mamatoktsü," ta

metetdaksü.

Congress lenir, Rahul Gandhi-i twitter ajanga, "Pulwama amakba mapang asür tasütait sepaitem nem akhüm agütsür. Parnok kibongtem nem-a aküm agütsür, kechiyong linük nenok matsüngdang sentsüh lir," ta metetdaksü.

Uttar Pradesh Chief Minister, Yogi Adityanath-ia twitter ajanga, "Asenok tarutsü nung kümzüka alitsü atema Pulwama amakba mapang taküm bendanga agütsürtem nem akhüm agütsür. Parnoki taküm tenla agütsüba ajanga kiralongra anema raratsü asoshi asenok teti ajungshitsü," ta metetdaksü.

BJP National Tir, JP Nadda-i twitter ajanga, "Pulwama, Jammu & Kashmir nung kiralongrartemi amakdang taküm tenla agütsür India chir tasütait nisungtem nem ni akhüm agütsür. Parnok dak tasütait tanela aliba atema India sentsüh lir," ta metetdaksü.

Karnataka Chief Minister BS Yediyurappa aser Madhya Pradesh Chief Minister Shivraj Singh Chouhan natia Pulwama nung asür sepaitem nem akhüm agütsü.

Senate nung Donald Trump maitsütet

Washington, Tsüklai/February 14 (Agencies): US Capitol nung sorkar anema January 6 nü rongrong adoktsü ajungmesoba ken o nung taoba Tir Donald Trump aitsütsü asoshi nungdakba ama US Senate nung asemsü kuma sadanger shilem ana mongutet.

Republican nungi züngsem tenet densema nisung 57-i Trump aitsütsü vote agütsü aser züngsem 43-i pa medenja vote agütsü. Pa aitsütsü asoshi vote 67 nungdaka liasü, koba vote 10 agi meperi.

Pa medentsüba sülen Trump-i sangdong ka agütsüba nung pa ken o jembiba aitsü aser puti otsü nung 'witch hunt' tulutiba, ta ashi.

Ibai Trump anema benokba ken o tanabuba liasü.

Pa aitsü asübo Senate ajanga vote agütsüteper tarutsü nung pa tir menden asoshi toktepba nungi nokdangtsü liasü.

Vote agütsütepba sülen Congress nung Republican tejen, Senator Mitch McConnell-i, Capitol nung rongrong adokba ya Trump mapa liasü aser ibai pei teinyaktsü meinyaki senzüka yutsüba lir, ta ashi.

Tamalen pai Trump aitsüba anema vote agütsü aser tangbo pa tir ka masüji constitution agi melaba ka masü, ta shia liasü. January 20 nung Trump-i tir menden meyutsü tashi ken o menudaktsütsü atema inyaktepba nung McConnell-i shilem tulu agia liasü.

Ajisüaka court nungbo Trump-i telangzüba agütsütsü tim, ta McConnell-i ashi.

"Pa tang tashi jenbua mali. Iba linük nung criminal justice system lir, asenok civil

litigation lir aser taoba tirtem item nungi jenbua mali," ta pai ashi.

Tir Joe Biden-i ashiba agi, vote agütsütepba nung maitsütet, anungji ken o nung mangatetep mali.

"Asen puti otsü nung iba tejashitsü tabu yagi democracy anüka jaksar aliba sayur. Aser ibaji teti kumzüka ayutsüla. Asenok kanga kumdanga alitsüla. America nung azüdokshi aser extremism atema tesem mali. Aser asenok America nunger kaka ama aser talisa lenirtem ama ochi bukumtsüla aser tiazü madak takok ngutetsüla."

Republican telok nungi Trump anema vote agütsü züngsem tenet ya Lisa Murkowski, Susan Collins, Ben Sasse, Bill Cassidy, Richard Burr, Mitt Romney aser Pat Toomey nungertem liasü.

Collins-i Trump anema vote agütsütsü telemtetba agiba indang rasaa ashiba mapang, linüki jangraba inyaktsü melena pai (Trump) pa tejangraba nung inyakba ajanga Capitol nung rongrong adoktsüsa akum, ta ashi.

"Tir Trump-i tim masüba nung tashi amshiba aser tenangzükba agiba sendokadokba ajanga pai aibelen mapa inyak ta sayuteter aser iba mechi ni Donald J. Trump anema vote agütsü."

Trump nem temeden agütsütsü ya lendong asütsü, ta Senate ajanga iba mapa ketdangtsütsü atema shimtetba Democratic House of Representatives ozüing yanglurtemi ashi.

"Lendong ya iba dang nungi tuluba malitsü akok, kechiaser ochibaji January 6 nung atalokba ya ano ataloktsü akok," ta Representative Joe Neguse-i ashi.

Saka Trump indang okatsür Michael van der Veen-ibo, Democrats temi Trump anema ken o benoktsü tejangraba liasü, ta ashi.

"Iba ken o ya tetenzük nungi tatem tashi renema yur inyakba maparen ka lir. Ibai opposition party ajanga Trump anema tamalen nungi yimtenren tsütsü tenük yoka aruba ka dang lir," ta pai ashi.

Trump-ia, tir shingai kodanga iba ama ajangshia mali aser Make America Great Again indang movement tang ang tenzük, ta ashi.

Senator temi mezüingbo tsüngtong arua kuli agütsütsü atema vote agütsü, aser yamaji inyak asübo Honibarnü obendang ya magütsütetla. Saka ken o mejembi anendaka mayutsü mechi ajungben shisa agitepba sülen parnoki tezüluba nung kisüing kuli agütsütsü lemtet.

Rongrong adok tialong nung taoba US tir aser Republican ketdangtsü Kevin McCarthy na phone ajanga sensaksemba indang jembiba sülen yimya melenshitsüsa akum.

Iba anogo McCarthy-i phone nung jembiba indang küdang shiogo, ta House of Representatives nung Republican züngsem Jaime Herrera-Beutler-i ashi.

McCarthy-i Trump dang longkak aiter anendaktsütsü asoshi ajungshi saka tiri tai nung "antifa" ta ajaba left-wing activist tenüing sena liasü, ta lai ashi.

"Ajisüaka McCarthy-i tir dang ibai Trump busemertem ta ashi. Aser iba mapang tiri Kevin dang election atema nü dang nungi item nisung ya tejashiba lir ta ashi," ta Herrera-Beutler-i ashi.



Italy Ato Kilonser tejenba, Giuseppe Conte-i February 13, 2021 nü Ato Kilonser tasenba Mario Draghi (achichi) nem Rome, Italy nung aliba Palazzo Chigi nung cabinet minister indang tsüngtsüing amoktsüba mapang tangokba noksa nung angur. Ato Kilonser Mario Draghi, shiba taoba mapang European Central Bank tekolakba inyaka liasü, pai tentetba Italy sorkar tasenba ya Deobarnü tenangzükba agiogo.

Army-i Myanmar sorkar amokbangba anema Tokyo nung longkak ait

kyo, Tsüklai/February 14 (Agencies): Myanmar nung military-i sorkar atsüngtokba anema Tokyo nung Deobarnü nisung meyirejang aikati longkak aitogo. Longkak aiterem aikati pua aliba lenir Aung San Suu Kyi indang noksa bener liasü. Longkak aitba sentong ayongertemi ashiba iba sentong ya tanü tashi nung Japan nung iba amala mesükba sentong rongnung tulutiba asütsü.

Iba sentong nung nisung 4,000 dak temai shilem agi, ta sentong ayongertemi ashi. Parnoki Shibuya aser Omotesando shishilembadak yimtonsüa ao. Longkak aiteremi "Help us save Myanmar" aser "Stop Crimes Against Humanity" ta zülua bener longkak aita liasü.

Deobarnü Myanmar nunga nisung meyirejang aikati longkak aitba mapang kasa nung Japan nunga iba sentong ayongzüka agi. February 1 nü military-i sorkar atsüingba sülen

Japan nung longkak aitba sentong aika ayongzüka agiogo, koba timba Japan nung aliba Myanmar nungertemi ayongzüka asütsü.

Lenir Suu Kyi sota aliba Hombarnü tembangtsü aser kasa mapang nung anüolen aliba linüktemia iba inyakyim aitsüogo. Maneni United States-i general tem nem tenokdangba kar agütsüogo.

"Iba inyakyim ya kanga temulung shirangtsüka," ta Yangon nungi arishi küm 45 tain Thant Zaw Htun-i Myanmar nung longkak aitba indang jembidang ashi.

"Ni parnok den külemi shilem agitsü atema Myanmar-i meyipa oner, saka moteter kechiyong tenokdangba balala agüja lir. Iba melena ni tanü ni akokba tashi inyaktsü atema iba sentong nung shilem agir," ta pai ashi.

Longkak aiteremi kar Suu Kyi indang noksa ama, kari mask asem aser kari earrings nung Suu Kyi indang noksa aketba anor longkak ait.

Lebanon nung Covid-19 vaccine agütsü tenzükogo

Beirut, Tsüklai/February 14 (Agencies): Lebanon nung Deobarnü nungi Covid-19 vaccine agütsü tenzükogo. Mezüingbuba vaccine public hospital tulutiba, critical care nung tekolakba nem agütsü aser iba sülen Arishi küm 93 tain Lebanon nunger actor aser comedian Salah Tizani nem agütsü.

Hopta ishika tsüngda tashidak menar tali akümba ajanga healthcare inyakyim kanga toushi nung aliba mapang Honibarnü Pfizer-BioNTech vaccine 28,500 agizük, koba vaccine dose million 2.1 angutsü aliba nung mezüingbuba shilem asütsü.

Vaccine mekazüka ayutsü aser vaccine agütsüba sentong menoba ajanga Lebanon nung nüburtem tezüdangtepa liasü. World Bank-i vaccine mezüingbuba shilem alizüktsü atema senotsü teyari agütsü aser parnoki ashiba agi, nüngdakbapurtem nem mezüing agütsütsü atema parnoki

vaccine agütsüba sentong asadanga alitsü.

"Ni tanü vaccine magitsü kechiyong tanü ya ni vaccine agitsüba tata anogo masü aser vaccine mezüingbuba medical sector nung inyaktertem nem agütsütsü, shirnoki taküm bendanga agüja inyaka arudar," ta caretaker Prime Minister Hassan Diab-i Rafik Hariri hospital nung osangbenertem dang ashi.

Tizani shiba dang Abou Salim ta ajar, pai nüburtem dang vaccine agitsü atema ajungshia liasü.

"Vaccine agitsü tsüburtem dang ni Tsüngrem tenüing nung iba ya nenok kümzüka ayutsü atema lir ta angatetdaksüner," ta pai ashi.

Lebanon-isa, global COVAX scheme ajanga vaccine dose million 2.7 mekazükogo aser ketdangtsürtemi ashiba agi, AstraZeneca vaccine dose million 1.5 alizüktsü atema jembishinüdar.



Athens, Greece nung tasen lapokba COVID-19 vaccination center nung army medical workers tem nokdaka aliba noksa nung angur. Athens nung aliba vaccination center tulu ya exhibition center ka nungi yangluba lir, koba Hombarnü lapoktsü aser yangji anogoshi nisung 5,760 anepalutetsü.

Hector aser Hector Plus SUV sayaogo



New Delhi, Tsüklai/February 14, 2021 (Agencies): MG Motor-i Hector aser Hector Plus SUV India nung sen lakh 12.18 (Ex-showroom) agi sayaogo. MG-i gari anaprongla nung CVT gearbox inoksemtsüogo aser Hector den Hector Plus variant nung saya. Hector Petrol CVT Smart variant jenjang sen lakh 16.52 aser Sharp variant jenjang sen lakh 18.10 alitsü.

Ano külen, Hector Plus ya 7-seater variant melen CVT gearbox, 6-seater version nungang angutsü. Hector Plus petrol CVT Smart variant jenjang sen lakh 17.22 aser Sharp variant jenjang sen lakh 18.90 alitsü.

Tang Variant pezü bendenloka, Hector nung 5-,6-aser 7-seater densema Hector gari 27 kümogo. Item variant rongnung engine 3 aser gearbox option 3 angutsü.

Hector Style variant ya Petrol powertrain aser

manual transmission angutsü. Super variant Petrol manual jenjang lakh 12.98 aser petrol hybrid deb manual transmission sen lakh 13.58 aser diesel den manual transmission jenjang lakh 14.18 asütsü.

Item variant dak alaka, Smart variant - petrol hybrid manual transmission, petrol DCT aser diesel manual transmission jenjang sen lakh 14.68, lakh 15.28 aser lakh 15.48 alitsü. Ano külen, Sharp variant - petrol hybrid manual transmission jenjang sen lakh 15.88 agi angutsü. Tanga option - Sharp variant rongnung petrol DCT aser Diesel manual transmission dena lir, koba sen lakh 16.78 aser sen lakh 16.88 (ex-showroom) alitsü.

Hector gari tasentem atema customer 1000 dak temai mekaogo. MG-isa Hector tasenba atema after-sales support agütsütsü. Hyundai Venue sülen, India

shishilembadak Hector ya tanabuba connected car ama alitsü. MG Hector nung Machine-to-Machine (M2M) sim embedded lir, koba SUV rongnung iba feature aketba mezüing gari alitsü.

MG Hector nung first-in-class feature talisa 360-degree camera, front parking sensors, internet, AI-based online navigation aser voice recognition, TPMS den tanga aika keta aliba angutsü. Tanga feature tsütsü reprangdangra, gari nung LED headlights, remote car operation, 10.4-inch touch screen system aser panoramic sunroof angutsü. Safety feature talisa front aser rear disc brakes, ESP, TCS, hill-hold control aser vehicle stability management tem variant ajunga nung standard ama angutsü.

Iba gari nung 10-spoke alloy wheels aser rear-view mirrors tulu den integrated turn signal lights keta lir. Tanga feature rongnung power adjustable seats, cruise control, electronic parking brake aser 360-degree camera dena lir.

Hector SUV tasazük 4655 mm (length), 1835 mm (width) aser 1760 mm (height) den wheelbase - 2,750mm aser ground clearance 192mm alitsü.

Shishilembadak, MG Hector yagi Jeep Compass, Tata Harrier aser Mahindra XUV500 tem den tokteptsü.

TEACHERS WANTED

Applications are invited from interested candidates for the following posts to work in a Private School at Chuchu Town, Mokochung District.

Sl. No	Post	Qualification
1.	Headmaster / Headmistress	M.Sc /MA/B.Sc (with B.Ed)
2.	English Teacher	MA/BA (English Major)

Experienced / fresh candidates may mail your resume along with contact number and documents at greenhillsacademy2012@gmail.com on or before 20th February 2021.

KHANIMU BAPTIST AROGO TONGTEPRATEPER

Khrista nung temeim adianutem, iba osang zülu ajanga tazünger ajak dangi Yisu temeim salem abener. Khanimu nung aliba Tsüngremer tenla ki mopung ajanga raksatsüba agi tasen yanglushitsüsa kümer alidang, lokti, arogo aser kija kwikatisa sarasadem den rongsen jenti agi tenlaa arudar, item tenlatem to agi ki tasenbaji tenzüka odar. Yamaji ano nenok tamang sarasadem den rongsen teyari maneni nüngdaka lir ni ta tepelaba olen den teyari asoshi tongteprateper.Teyanglur Tsüngremi Pa külemba ki atema moajangma. Amen.

Sd/-
Pastor
Khanimu Baptist Arogo

India nung Lenovo Tab P11 Pro saya



New Delhi, Tsüklai/February 14, 2021 (Agencies): Lenovo-i India nung parnok indang Tab P-series tablet lineup nung Lenovo Tab P11 Pro tasen bendenlokba sangdongogo. Taoba küm September ita P11 Pro den Lenovo Tab M10 HD Gen 2 saya. Tab P11 Pro nung OLED display den Dolby Vision aser HDR support angutsü. Iba Android tablet nungsa instant unlocking atema inbuilt time-of-flight (ToF) sensors keta lir aser unibody design alitsü. P11 Pro ya Slate Grey sentsü nung angutsü.

India nung Lenovo Tab P11 Pro ya Amazon ajanga sen 44,999 agi angutsü. Talirtemi iba Android tablet den company keyboard ya Amazon sabang ajanga sen 49,999 alitettsü akok.

Iba den bendenloksema, iba e-commerce sabang - Amazon yagi offering sale deals talisa no-cost EMI den teshimtet credit cards, sen alang 12,400 exchange offer aser Yes Bank credit card nung sen 1,500 instant discount angutsü. Taoba küm, alima ajunga nung Lenovo Tab P11 Pro sayaa, koba EUR 699 (Sen 61,500) agi tenzüka ayok.

Design tsütsü

reprangdangra, Lenovo Tab P11 Pro tablet nung narrow bezels aser tesülen camera module ya pill-shape design alitsü. Iba tablet ya aluminium-alloy unibody frame tepungba amshia yangluogo. P11 Pro nung 11.5-inch WQXGA (2,560x1,600 pixels) OLED display den 500 nits peak brightness aser 100 percent RGB colour gamut inoka yanglutsüogo. Iba tablet nung octa-core Qualcomm Snapdragon 730G chipset den Adreno 618 GPU, 6GB LPDDR4x RAM aser 128GB onboard UFS 2.1 storage angutsü. Iba display panel yagi Dolby Vision aser HDR support asür. Iba den külemi, tablet ya Android 10 out of the box ajanga achaayangtsür aser LTE connectivity support asür.

Lenovo P11 Pro tejaklen 8-megapixel primary camera den 8-megapixel Infrared (IR) camera sensor inokja lir. Iba tablet tesülen dual camera setup angutsü, kong 13-megapixel primary camera den wide-angle lens aser 5-megapixel ultra-wide-angle shooter densema lir. Tanga feature tsütsü reprangdangra, iba tablet nung Wi-Fi 802.11 a/b/g/n/ac, Bluetooth 5.0 aser USB Type-C port angutsü. P11 Pro nung battery tasazük 8,600mAh alitsü aser company-i ashiba agi tablet yagi ghonda 15 tashi video playback aser ghonda 8 tashi web browsing süteter. Ano külen, iba tablet yagi Lenovo Precision Pen 2 stylus support asütsü, koba tablet den balaka angutsü.

Bigg Boss 14 sülen Salman Khan-i 'Pathan' tangoktsü

New Delhi, Tsüklai/February 14, 2021 (Agencies): Reality TV show "Bigg Boss", koba season 14buba sayudar, iba show tangokzüker sülen "Pathan" atema Superstar Salman Khan-i iba film tangokba maparen tenzüksü ta osang agütsüogo. Iba film nung Shah Rukh Khan-i tongti shilem agitsü terenemba lir. Film ya action-thriller ka asütsü ama asadangteter aser Yash Raj Films (YRF) ajanga produce asütsü. Kasa mapang "Pathan" ya "War" director Siddharth Anand-i direct asütsü aser 2018 küm sayaba Zero sülen Shah Rukh Khan indang mezüing film alitsü; iba film nung Salman Khan-ia shilem tilaka agiogo. Osangtem ajanga angazükba agi, "Pathan" film nung Salman Khan-ia shilem agitsü.

"Bigg Boss" indang 'Weekend Ka Vaar' episode, koba aruya aliba hopta tatemlen tembangtsü, iba episode mapang "Bharat" star Salman-i "Tiger" franchise

indang installment tasembuba den "Kabhi Eid Kabhi Diwali" aser pa indang taruba film kar sangdongogo. Iba show temer sülen, onoki 'Pathan' tangok tenzüksü, iba sülen 'Tiger (3)' aser 'Kabhi Eid Kabhi Diwali' tem atonga tangoktsü," ta Honibar aonung Salman Khan-i ashi.

"Bigg Boss" ketdangsüa agisang Salman-i, Colors TV show ya ano season ka sayutsü. "Ita 8 sülen, 'Bigg Boss 15' sayatsü terenemba lir," ta pai shisem.

Taoba küm November ita nungi "Pathan" maparen tenzüka liasü aser "Tiger" franchise indang installment tasembuba atema maparen taruba ita nungi tenzüksü asadangdar. 1998 blockbuster "Kuch Kuch Hota Hai" nunga Salman Khan ya 'guest appearance' shilem agiogo, kong film nung tongti shilem agisang ji Shah Rukh Khan liasü. Kuch Kuch Hota Hai film ya Karan Johar-i direct asüba mezüing film lir.

Ano külen, Shah Rukh

Khan-ia Tubelight" (2017) aser "Har Dil Jo Pyar Karega" (2000) densema Salman Khan indang film tem nung shilem agiogo (special appearances).

Action-thriller franchise "Tiger 3" ya YRF ajanga nungittsü, kong Salman Khan aser Katrina Kaif nati tanaben spy agents Tiger aser Zoya ama shilem agitsü. Iba film nung Emraan Hashmi-i shilem agiba angutsü, ta otongdar sangdong ka ajanga metetdaksü.

Franchise nung mezüing film "Ek Tha Tiger" (2012) nung, bushisüngdaba mapang India nunger spy Tiger (Khan)-i Pakistan tsür spy (Kaif) den nüknüratepba otsü sayur. 2017 küm sayaba "Ek Tha Tiger" ya Ali Abbas Zafar-i direct asü.

"Fan" aser "Band Baaja Baaraat" Maneesh Sharma nati installment tasembuba direct asütsü terenemba lir. "Kabhi Eid Kabhi Diwali" ya Sajid Nadiadwala-i zülua aser produce asütsü. "Housefull 4" yanglusang Farhad Samji-i iba film direct asütsü.

A0: Halep, Zverev-i takok angu; Thiem tsükogo

Tsüklai/February 14, 2021

(Agencies): Deobarnü Australia Open tetsür kija asaya nung second seed Simona Halep-i 3-6 6-1 6-4 agi Iga Swiatek kokogo. Taoba kuma French Open nung kasa jenjang nung asayaba mapang Swiatek-i Halep tsükdaksü ajisüaka takumbo halep-i mang yangogo.

Mezüngbuba set nung Swiatek-i, game tenetbuba nung break point ana kümzük aser iba sülen taruba game nung Halep indang serve break süa asaya akok.

Ajisüaka tanabuba set tetenzükli Halep-i, Iga indang serve break asü aser baseline nung asayaba ajanga Iga tezüdangdaksü, shibai aibelen aika mena liasü.

Romania tsürla yagi tanabuba aser tasembuba set nung game pongungu atonga koka asaya akok.

Tetsür kija asaya nungsa Serena Williams-i 6-4, 2-6, 6-4 agi Belarus tsür Aryna Sabalenka koka quarter-finals-i iogo.

Iba asaya ya Williams asoshi tetendangba tulu ka liasü, shiba tetsür asayatem rongnung la den baseline nung toktepa asayatetba asayar ishika rongnung ka den asayaa liasü.

Kasa asayamung tebur kija asaya nung Germany nunger sixth seed asayar Alexander Zverev-i, 6-4 7-6(5) 6-3 agi Serbia nunger asayar Dusan Lajovic madak takok ngua Australia Open quarter-finals tongtetogo.

Taoba mapang French Open nung anaben tashi asayaba mapang Zverev-i set pongu asayar külenang Lajovic akok, ajisüaka Deobarnü asaya nungbo pai service kanga ajanga oa asaya ayong ayonga akok.

Zverev-i pa indang mezüngbuba serve shilem 72 aibelen mesüi ao aser winners 44 ngua arishi küm 30 Lajovic madak takok angu.

Pa QF nung Djokovic den semifinal nung jenjang ka atema asayatsü, shibai Raonic tsükdaksüogo.

Tebur kija asaya nungsa Dominic Thiem, Grigor Dimitrov-i Deobarnü round pezübuba nung tsükdaksüogo.

Hokolbarnü Nick Kyrgios akokba asaya nung kanga belema asayaba sülen Austria nunger third seed asayar ya tashi mali ama reprangteta liasü.

Pai Dimitrov den jangyu medema masayatet aser 6-4, 6-4, 6-0 agi asaya makok.

Dimitrov taruba asaya Russia nunger qualifier Aslan Karatsev den asayatsü, shiba Felix Auger-Aliassime madak takok ngua liasü.

Mokokchung nung BBBP Badminton asayamung tembangogo

Mokokchung, Tsüklai/February 14, 2021 (TYO):

Tetsürtem atema Mokokchung nung anogo ana ayongba Beti Bachao Beti Padhao Beti Khilao Badminton asayamung, koba Brehostibarnü (11.02.2021) nungi tenzük, iba asayamung Hokolbarnü (12.02.2021) tembangogo. BBBP Khilao Badminton asayamung ya District Administration & DLCW- MSK (BBBP) Mokokchung district aser Mokokchung District Badminton Association longjemer ayongzük.

Iba asayamung shibangba sentong nung ADC Mokokchung, Shashank Pratap Singh IAS-i takok angur aser runners-up nem kuli kakat den

senpet sen agutsü.

Arishi küm 11 Category kija tetoktepba nung Ms. Yalemjungla-i takok angur aser , Runners up ji Ms. Moakumla liasü. Arishi küm 15 telemsa nung Imlikumla-i mezüngbuba jenjang angur aser runners-up Temjennaro liasü. Open Category kija asaya Mepulila-i akok aser tanabuba jenjang Watisungla-i angu.

Arishi küm 15 category tarep tetoktepba nung Imsusenla Longkumer aser Temjennaro nati takok angu; aser Runners-up ji Yalemjungla & Repatula Longkumer na liasü. Open tarep asaya Arenchila & Sunepbenla nati akok aser Runners up ji Watisungla & Imlikumala na liasü.

Bayern-i Leipzig nungi Upamecano alizükogo



Dayot Upamecano

Munich, Tsüklai/February 14 (Agencies): Bayern Munich-i taruba season atema France nunger defender Dayot Upamecano, Bundesliga nung parnok tsükchir Leipzig nungi alizükogo

Bayern-i Deobarnü sangdong ka ajanga ashiba agi, arishi küm 22 tain Upamecano-i, July 1 nü nungi tenzuka 2026 June ita tashi asayatsü atema tenangzüktepba ka mulunga agizükogo.

Taruba kumtem tsüngda Dayot ya ozü team atema kanga tongtibang asayar ka asütsü ta onoki kanga temulung lema bilemer, ta Bayern sporting director Hasan Salihamidi-i ashi.

Leipzig nung Upamecanos alizüksü atema 42.5 million euro (\$51.5 million) buyout clause yanglua aliba Bayern-i mulunga agizükogo.

Onoki Dayot aser pa indang advisor Volker Struth den ita aika kanga süoki ia sensaksemogo. Tetoktepba kanga tesashi ta onoki meteta lir. Upamecano ya lanur asayar ka aser pa sempetem kanga

kara renlokogo, ta Salihamidi-i taoba mapang Bild tabloid dang ashi.

Bayern nung Upamecano-i, Austria nunger defender David Alaba melentsü, shiba contract atsülangshitsü atema sensaksem takok monguteti club toktsür aotsü lir.

Upamecano, 2017 küm January ita Salzburg nungi euro million 10 yong Leipzig nung arua aden aser pa yakta dang club nung kanga tongtibang asayar ka aküm. Iba season pa Leipzig indang league game ka nung dang tetenzük nungi masayai arur Hokolbarnü mimlai pa Augsburgs den asaya nung shilem magidaksü. Leipzig pur Mongolbarnü Champions League nung Liverpool den asayatsü.

Leipzig-i, July ita arishi küm Croatia nunger central defender Joko Gvardiol, Dinamo Zagreb nungi euro million 16 yong alitsü. Kasa mapang nung parnoki France nunger defender Mohamed Simakan, euro million 18 yong Strasbourg nungi alizüksü atema tang jembishinü tesüdak lir.

World Para Athletics Grand Prix: India-i medal 23 angu

Tsüklai/February 14, 2021

(Agencies): 12buba Fazza World Para Athletics Grand Prix nung high jumpers Praveen Kumar aser Nishad Kumar nati gold medal kaka ngua Asian record tasen yanglur asayamung tembangogo.

Tatembangbuba anogo nung, Praveen o Nishad nati gold anguba ya India atema high point liasü shirnoki Honibarnü silver asem aser bronze ka angu. Iba asayamung nung India team-i ajak senteper medal 23 angu.

Asayamung nung India-a medal aika kokteter rongnung densemer tembangogo. Asayamung nung Thailand-i medal 34 angu aser Turkey, Kenya aser India-i medal 23 ngua liasü. Asayamung ayongba linük UAE-i medal 14 angu, kong paralympic

medallist middle-distance racer Mohammed Al Hammadi-i silver ana anguba densema lir.

Arishi küm 18 tain Praveen-i, high jump asaya nung meter 2.05 joka Asian record tasen ka yanglu aser kasa mapang nung tebur high jump F42/44/64 event nunga gold angu. Pa taoba mapang Asian Para Games gold medallist aser külem India nunger asayar Sharad Kumar (1.76 m) aser Hamada Hassan (1.76m) na jakdang tembang.

Praveen asoshi iba ya mezüngbuba senior international gold asütsü aser Dubai 2019 Worlds sülen tang agi tanabenbuba senior asayamung nung shilem agiogo. Dubai nung asayaba mapang jenjang pezübuba nung tembangba sülen pai

quota ka nguteta liasü.

Kasa mapang nung tebur high jump T46/47 event nung Nishad-i meter 2.06 joka gold anguba den Asian record ka yangluogo. Dubai 2019 Worlds nung bronze medal anguba sülen pai India atema quota ka mekazüker liasü.

Asayamung nungsa Simran-i, tetsür 400m final T13 event nung alizüng 1:01.56 minutes nung tongteta silver angu. Laisa tetsür 100m T13 nung gold nguadoker liasü.

Bhagyashri Mahavr Jadhav-i tetsür shot put F34 event nung silver angu. Lai 6.18 m merepteta Morocco tsür Saida Amoudi (8.33 m) sülen tanabuba jenjang nung tembang.

Tebur discus F57 event nung Atul Kaushik-i bronze medal ngua liasü.

Atletico aser Chelsea CL asaya Romania nung asayatsü

Nyon, Tsüklai/February 14

(Agencies): Atletico Madrid aser Chelsea na tsüngda Champions League asaya Romania nung asayatsü telemtetba agiogo. England nung coronavirus dak sendakba nung senzusenpongtsü atema tenokdangba balala agütsür aliba ajanga iba jenjang agitsüsa aküm.

Last-16 mezüngbuba leg asaya Madrid nung asayatsü aliba melena Bucharest kübok Arena Naional nung February

23 nü asayatsü, ta UEFA-i sangdong ka ajanga metetdaksü.

Chelsea-i ashiba agi, tanabuba leg asaya March 17 nü Stamford Bridge nung ayongzuka asayatsü.

England nung COVID-19 tashidak tapu tasen ka kanga kara prokshia aoba ajanga tebilemtsü kaa, Europe nung taruba asayatem atema Premier League team pezü asayadak tesem meleshitsüsa aküm.

Taruba hopta ana tsüngda

Liverpool aser Manchester City naprongla Leipzig aser Borussia M'chengladbach den taruba Champions League asaya Budapest, Hungary nung asayatsü telemtetba agiogo.

Europa League nung Turin nung Juventus indang home stadium nung February 18 nü Manchester United aser Real Sociedad na asayatsü.

Kasa anogo Arsenal aser Benfica na Lisbon nung asayatsü aliba Rome kübok Stadio Olimpico-i belener ogo.

BILEMDANGANG

"Taküm tenla agütsüba dak alia temeim tuluba kechi ali."